

Sarajevo 24.03.2016.
Aner Žuljević, delegat

Bosna i Hercegovina
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
DOM NARODA
SARAJEVO

Primljeno: 25-03-2016			
Org. jed.	Broj	Priloga	Vrijednost
02-02	-	267/16	

BOSNA I HERCEGOVINA
FEDERACIJA BOSNE I HERCEGOVINE
PARLAMENT FEDERACIJE BOSNE I HERCEGOVINE
DOM NARODA

n/r gospođe Lidija Bradara, predsjedavajuća

Na osnovu članova 177 i 178 Poslovnika o radu Doma naroda Parlamenta FBiH, podnosim

AMANDMANE

Na Prijedlog zakona o izmjenama i dopunama Krivičnog zakona FBiH

AMANDMAN 1.

U članu 71. iza tačke e) dodaje se nova tačka f) koja glasi:

„ f) zabrana pristupa sportskim takmičenjima.“

AMANDMAN 2.

Iza člana 78. dodaje se novi član 78a. koji glasi:

„Član 78a.

Zabrana pristupa sportskim takmičenjima

(1) Sigurnosna mjera zabrane pristupa sportskim takmičenjima može se izreći učinocu krivičnog djela izazivanje ili sudjelovanje u neredima na sportskim takmičenjima ili krivičnog djela Učestvovanja u tuči iz člana 174. stav 2. ovog zakona, kada postoji opasnost da će ponovo učiniti takvo krivično djelo.

(2) Sigurnosna mjera iz stava 1. ovog člana može se izreći u trajanju koje ne može biti kraće od tri

mjeseca ni duže od pet godina računajući od pravosnažnosti sudske odluke, s tim što se vrijeme izvršenja kazne zatvora ne uračunava u vrijeme trajanja ove mjere.“

AMANDMAN 3..

U članu 172. stav 1. riječi: „šest mjeseci“ zamijenjuju se riječju „jedne“.

U stavu 2. riječ „jedne“ zamijenjuje se riječju „dvije“.

Iza stava 2. dodaje se novi stav 3. koji glasi:

„(3) Ko krivično djelo iz stava 1. ovog člana izvrši upotrebom vatrenog ili hladnog oružja, kaznit će se kaznom zatvora najmanje tri godine“.

Dosadašnji st. 3, 4, 5, 6, 7. i 8. postaju st. 4, 5, 6, 7, 8. i 9.

U stavu 4. riječ „jedne“ zamijenjuje se riječju „dvije“.

U stavu 5. riječi: „rasnih, narodnosnih ili vjerskih pobuda“ zamijenjuju se riječju „mržnje“.

U stavu 6. riječ „jedne“ zamijenjuje se riječju „dvije“.

AMANDMAN 4.

U članu 173. stav 1. riječ: „jedne“ zamijenjuje se riječju: „dvije“.

U stavu 2. riječ „jedne“ zamijenjuje se riječju „dvije“.

AMANDMAN 5.

U članu 174. riječi: „tri mjeseca“ zamijenjuju se riječima: „šest mjeseci“.

Iza stava 1. dodaje se novi stav 2. koji glasi:

„(2) Ko krivično djelo iz stava 1. ovog člana učini povodom održavanja sportskog takmičenja, neposredno prije održavanja ili za vrijeme održavanja ili neposredno nakon održavanja sportskog takmičenja, kaznit će se kaznom zatvora od tri mjeseca do pet godina.“

AMANDMAN 6.

U članu 183. stav 1. riječi: „šest mjeseci“ zamijenjuju se riječima: jedne godine“.

U stavu 2. riječi: „tri mjeseca“ zamjenjuju se rječima: „šest mjeseci“.

AMANDMAN 7.

U članu 222. stav 1. riječ „jedne“ zamijenjuje se rječju „dvije“.

U stavu 3. riječi: „tri mjeseca“ zamijenjuju se riječima: „šest mjeseci“.

U stavu 4. riječ „jedne“ zamijenjuje se rječju „dvije“.

AMANDMAN 8.

U članu 286. stav 1. riječi: „novčanom kaznom ili kaznom zatvora“ zamijenjuju se riječima: „kaznom zatvora od šest mjeseci“.

AMANDMAN 9.

U članu 287. stav 1. riječi: „šest mjeseci“ zamijenjuju se rječju: „jedne“.

AMANDMAN 10.

U članu 288. stav 1. riječ „jedne“ zamijenjuje se rječju „dvije“.

AMANDMAN 11.

U članu 289. stav 1. riječ „jedne“ zamijenjuje se rječju: „tri“.

AMANDMAN 12..

U članu 323. stav 1. riječi: „tri mjeseca“ zamijenjuju se rječima: „šest mjeseci“.

U stavu 3. riječi: „šest mjeseci“ zamijenjuju se rječju „jedne“.

AMANDMAN 13.

Iza člana 323. dodaje se novi član 323a. koji glasi:

„Član 323a.

Izazivanje ili sudjelovanje u neredima na sportskim takmičenjima

- (1) Ko za vrijeme sportskog takmičenja na bilo koji način iskazuje ili potiče mržnju na osnovu rasne, nacionalne ili vjerske pripadnosti ili neke druge posebnosti, kaznit će se kaznom zatvora od tri mjeseca do tri godine.
- (2) Ko poziva i potiče na tuču ili na napad na gledaoce, redare, službene osobe organizatora sportskog takmičenja, sportiste i druge sudionike u sportskom takmičenju kaznit će se kaznom zatvora od tri mjeseca do dvije godine.
- (3) Ko sudjeluje u tuči ili napadima na gledaoce, redare, službene osobe organizatora sportskog takmičenja, sportaše i druge sudionike u sportskom takmičenju, kaznit će se kaznom zatvora od tri mjeseca do dvije godine.
- (4) Ko oštećuje ili uništava dijelove sportskog objekta, te prijevozna sredstva i drugu imovinu prilikom dolaska, za vrijeme održavanja ili nakon završetka sportskog takmičenja kaznit će se novčanom kaznom ili kaznom zatvora do jedne godine.
- (5) Ko neovlašteno uđe na teren na kojem se odvija sportsko takmičenje kaznit će se kaznom zatvora do šest mjeseci.“

Amandman 14.

Iza člana 336. dodaje se novi član 336a. koji glasi:

„Član 336a.

Opasna vožnja u saobraćaju

Učesnik u saobraćaju koji na posebno opasan ili posebno drzak način teško krši saobraćajne propise vozeći u stanju nesposobnosti za vožnju izazvanoj trošenjem alkohola uz koncentraciju od najmanje 1,50 g/kg alkohola u krvi, ili drugih omamljujućih sredstava, ili vozeći u zabranjenom smjeru, ili pretječući na nepreglednom mjestu kolonu vozila, ili vozeći brzinom koja prelazi pedeset km/h iznad dopuštene u naseljenom mjestu ili području s naznačenim ograničenjem brzine, i time izazove opasnost za život ili tijelo ljudi, kaznit će se kaznom zatvora do tri godine“.

AMANDMAN 15.

U članu 362. stav 1. riječi: „tri mjeseca“ zamjenjuju se rječima: „šest mjeseci“.

U stavu 2. riječi: „šest mjeseci“ zamjenjuju se rječju: „jedne“.

AMANDMAN 16..

U članu 371. stav 1. iza riječi: „zatvora“ dodaju se riječi: „od jedne“.

OBRAZLOŽENJE

Amandmanima 1. i 2. u naše krivično zakonodavstvo uvodi se Sigurnosna mjera zabrane pristupa sportskim takmičenjima. U tom smislu propisuju se način, uvjeti i vrijeme trajanja izricanja ove sigurnosne mjere.

Amandmanima od 3. do 12. te 15. i 16. vrši se pooštavanje kaznene politike prema počiniocima krivičnih djela iz sljedećih odredbi: član 172. Teška tjelesna ozljeda, član 173. Lahka tjelesna ozljeda, član 174. Učestovanje u tuči, član 183. Ugrožavanje sigurnosti, član 222. Nasilje u porodici, član 286. Krađa, član 287. Teška krađa, član 288. Razbojnička krađa, član 289. Razbojništvo, član 323. Izazivanje opće opasnosti, član 362. Nasilničko ponašanje i član 371. Nedopušteno držanje oružja ili eksplozivnih materija.

Amandmanom 13. uvodi se novo krivično djelo Izazivanje ili sudjelovanje u neredima na sportskim takmičenjima. Rukovođeni sve raširenijom pojavom nasilja na i povodom sportskih takmičenja, pristupilo se kriminalizaciji najraširenijih oblika ovih društveno opasnih ponašanja. Obzirom da društvo trenutno nema odgovarajućih normativnih mehanizama za suzbijanje ove sve raširenije pojave, opredjeljenje ovog zakonskog nacrta jeste upravo da se kriminalizacijom ovakvih ponašanja konačno stane u kraj nasilju na sportskim takmičenjima.

Amandmanom 14. se u Krivični zakon Federacije Bosne i Hercegovine uvodi novo krivično djelo Opasna vožnja u saobraćaju.

ODREDBE ZAKONA KOJE SE MIJENJAJU

SIGURNOSNE MJERE

Član 71.

Vrste sigurnosnih mjera

Učiniteljima krivičnih djela mogu se izreći ove sigurnosne mjere:

- a) obavezno psihijatrijsko liječenje;
- b) obavezno liječenje od ovisnosti;
- c) zabrana vršenja poziva, aktivnosti ili funkcija;
- d) zabrana upravljanja motornim vozilom;
- e) lišenje predmeta.

Član 172.

Teška tjelesna ozljeda

- (1) Ko drugoga teško tjelesno ozlijedi ili mu zdravlje teško naruši, kaznit će se kaznom zatvora od šest mjeseci do pet godina.
- (2) Ko krivično djelo iz stava 1. ovog člana učini prema bračnom partneru ili osobi s kojom živi u izvanbračnoj zajednici ili roditelju svog djeteta s kojim ne živi u zajednici, kaznit će se kaznom zatvora od jedne do pet godina.
- (3) Ko drugoga tjelesno ozlijedi ili mu zdravlje naruši tako teško da je zbog toga doveden u opasnost život ozljeđenog ili je uništen ili trajno i u znatnoj mjeri oslabljen koji važan dio njegova tijela ili koji važan organ, ili je prouzrokovana trajna nesposobnost za rad ozljeđenoga ili trajno i teško narušenje njegova zdravlja ili unakaženost, kaznit će se kaznom zatvora od jedne do deset godina.
- (4) Kaznom iz stava 3. ovog člana kaznit će se ko krivično djelo iz stava 1. ovog člana učini iz rasnih, narodnosnih ili vjerskih pobuda.
- (5) Ako ozlijeđeni umre zbog ozljede iz st. 1. do 4. ovog člana, učinitelj će se kazniti kaznom zatvora od jedne do dvanaest godina.
- (6) Ko krivično djelo iz st. od 1. do 3. ovog člana učini iz nehata, kaznit će se kaznom zatvora do tri godine.
- (7) Ko krivično djelo iz st. od 1. do 3. ovog člana učini namah, doveden bez svoje krivnje u jaku razdraženost napadom ili teškim vrijeđanjem od ozlijeđenog, kaznit će se kaznom zatvora od tri mjeseca do tri godine.

(8) Ko krivično djelo iz stava 4. ovog člana učini namah, doveden bez svoje krivnje u jaku razdraženost napadom ili teškim vrijeđanjem od ozlijeđenog, kaznit će se kaznom zatvora od šest mjeseci do pet godina.

Član 173.

Lahka tjelesna ozljeda

(1) Ko drugog lahko tjelesno ozlijedi ili mu zdravlje lahko naruši, kaznit će se novčanom kaznom ili kaznom zatvora do jedne godine.

(2) Ko krivično djelo iz stava 1. ovog člana učini prema bračnom partneru ili osobi s kojom živi u izvanbračnoj zajednici ili roditelju svog djeteta s kojime ne živi u zajednici, kaznit će se kaznom zatvora do jedne godine.

(3) Sud može učinitelju krivičnog djela iz stava 1. ovog člana izreći sudsku opomenu ako je učinitelj bio izazvan nepristojnim ili grubim ponašanjem oštećenog.

Član 174.

Učestvovanje u tuči

Ko učestvuje u tuči u kojoj je neko usmrćen ili je drugom nanesena teška tjelesna ozljeda za samo učestvovanje u tuči, kaznit će se kaznom zatvora od tri mjeseca do tri godine.

Član 183.

Ugrožavanje sigurnosti

(1) Ko ugrozi sigurnost neke osobe ozbiljnom prijetnjom da će napasti na život ili tijelo te osobe ili na taj način izazove uznemirenje građana, kaznit će se kaznom zatvora do šest mjeseci.

(2) Ko ugrozi sigurnost više osoba ozbiljnom prijetnjom da će napasti na život ili organ tih osoba ili taj način izazove uznemirenje građana, kaznit će se kaznom zatvora od tri mjeseca do pet godina.

(3) Ko prikradanjem, učestalim praćenjem ili uznemiravanjem na drugi način ugrožava sigurnost bračnog partnera, osobe s kojom živi u izvanbračnoj zajednici, roditelja svog djeteta ili druge osobe s kojom održava ili je održavao bliske veze, kaznit će se novčanom kaznom ili kaznom zatvora do jedne godine.

Član 222.

Nasilje u porodici

(1) Ko nasiljem, drskim ili bezobzirnim ponašanjem ugrožava mir, tjelesnu cjelovitost ili psihičko zdravlje člana svoje porodice, kaznit će se novčanom kaznom ili kaznom zatvora do jedne godine.

(2) Ko krivično djelo iz stava 1. ovog člana učini prema članu porodice s kojim živi u zajedničkom kućanstvu, kaznit će se novčanom kaznom ili kaznom zatvora do tri godine.

(3) Ako je pri učinjenju krivičnog djela iz st. 1. i 2. ovog člana upotrijebljeno oružje, opasno oruđe ili

drugo sredstvo prikladno teško ozlijediti tijelo ili narušiti zdravlje, učinitelj će se kazniti kaznom zatvora od tri mjeseca do tri godine.

(4) Ako je krivičnim djelom iz st. od 1. do 3. ovog člana član porodice teško tjelesno ozlijeđen ili mu je zdravlje teško narušeno, ili ako je krivično djelo iz st. od 1. do 3. ovog člana učinjeno prema djetetu ili maloljetniku, učinitelj će se kazniti kaznom zatvora od jedne do pet godina.

(5) Ako je krivičnim djelom iz st. od 1. do 4. ovog člana prouzrokovana smrt člana porodice, učinitelj će se kazniti kaznom zatvora od dvije do petnaest godina.

(6) Ko usmrti člana i kojeg je prethodno zlostavljao, kaznit će se kaznom zatvora najmanje deset godina ili kaznom dugotrajnog zatvora.

Član 286.

Krađa

(1) Ko tuđu pokretninu oduzme drugom s ciljem da njenim prisvajanjem pribavi sebi ili drugom protupravu imovinsku korist, kaznit će se novčanom kaznom ili kaznom zatvora do tri godine.

(2) Ako je ukradena stvar male vrijednosti, a učinitelj je postupao s ciljem pribavljanja imovinske koristi takve vrijednosti, kaznit će se novčanom kaznom ili kaznom zatvora do šest mjeseci.

(3) Učinitelj krivičnog djela iz st. 1. i 2. ovog člana koji ukradenu stvar vrati oštećeniku prije nego sazna da je otkriven, može se osloboditi kazne.

Član 287.

Teška krađa

(1) Kaznom zatvora od šest mjeseci do pet godina kaznit će se ko krađu (Član 286. Krađa, stav 1.) učini:

- a) obijanjem, provaljivanjem ili drugim savladavanjem većih prepreka da dođe do stvari iz zatvorenih zgrada, soba, blagajni, ormara ili drugih zatvorenih prostorija ili prostora;
- b) na naročito opasan ili naročito drzak način;
- c) iskorišćavanjem stanja nastalog požarom, poplavom, potresom ili drugom nesrećom;
- d) iskorišćavanjem bespomoćnosti ili drugog naročito teškog stanja druge osobe.

(2) Kaznom iz stava 1. ovog člana kaznit će se učinitelj krivičnog djela krađe (Član 286., stav 1.):

a) ako je ukradena stvar velike vrijednosti, a učinitelj je postupao s ciljem pribavljanja imovinske koristi takve vrijednosti;

b) ako ukradena stvar služi u vjerske svrhe ili je stvar ukradena iz vjerske ili druge zgrade ili prostorije koja služi za vjerske obrede;

c) ako je ukradeno kulturno dobro ili stvar od naročitog naučnog, umjetničkog, povijesnog ili tehničkog značenja ili se nalazi u javnoj zbirci, zaštićenoj privatnoj zbirci ili je izložena za javnost.

(3) Novčanom kaznom ili kaznom zatvora do tri godine kaznit će se ko učini krađu (Član 286. stav 2.) na način i pod okolnostima iz stava 1. ili stava 2., tač. 2. i 3. ovog člana.

(4) Kaznom zatvora od jedne do osam godina kaznit će se ko krađu (Član 286. stav 1.) učini u sastavu grupe ljudi, ili ako je sa sobom imao kakvo oružje ili opasno oruđe radi počinjenja djela.

Član 288. **Razbojnička krađa**

(1) Ko je zatečen pri učinjenju krivičnog djela krađe, pa s ciljem da ukradenu stvar zadrži, upotrijebi silu protiv neke osobe ili prijetnju da će izravno napasti na njezin život ili tijelo, kaznit će se kaznom zatvora od jedne do deset godina.

(2) Ako je krivičnim djelom iz stava 1. ovog člana neka osoba s umišljajem teško tjelesno ozlijeđena, ili je to krivično djelo učinjeno u sastavu grupe ljudi, ili ako je upotrijebljeno oružje ili opasno oruđe, učinitelj će se kazniti kaznom zatvora najmanje pet godina.

(3) Ako je pri učinjenju krivičnog djela iz stava 1. ovog člana neka osoba s umišljajem usmrćena, učinitelj će se kazniti kaznom zatvora najmanje deset godina ili kaznom dugotrajnog zatvora.

Član 289. **Razbojništvo**

(1) Ko upotrebom sile protiv neke osobe ili prijetnjom da će izravno napasti na njezin život ili organ oduzme tuđu pokretninu s ciljem da njenim prisvajanjem pribavi sebi ili drugom protupravnu imovinsku korist ili da je protupravno prisvoji, kaznit će se kaznom zatvora od jedne do deset godina.

(2) Ako je krivičnim djelom iz stava 1. ovog člana neka osoba s umišljajem teško tjelesno ozlijeđena, ili je to krivično djelo učinjeno u sastavu grupe ljudi, ili ako je upotrebljeno oružje ili opasno oruđe, učinitelj će se kazniti kaznom zatvora najmanje pet godina.

(3) Ako je pri učinjenju krivičnog djela iz stava 1. ovog člana neka osoba s umišljajem usmrćena, učinitelj će se kazniti kaznom zatvora najmanje deset godina ili kaznom dugotrajnog zatvora.

Član 323. **Izazivanje opće opasnosti**

(1) Ko požarom, poplavom, eksplozijom, otrovom ili otrovnim plinom, ionizirajućim zračenjem, motornom silom, električnom ili drugom energijom ili pucanjem iz vatrenog oružja ili kakvom opće opasnom radnjom ili opće opasnim sredstvom izazove opasnost za život ljudi ili imovinu većeg opsega, kaznit će se kaznom zatvora od tri mjeseca do tri godine.

(2) Kaznom iz stava 1. ovog člana kaznit će se službena ili odgovorna osoba koja ne postavi propisane naprave za zaštitu od požara, eksplozije, poplave, otrovnih plinova ili ionizirajućeg zračenja, ili te naprave ne održava u ispravnom stanju ili ih u slučaju potrebe ne stavi u rad ili uopće ne postupa po propisima ili tehničkim pravilima o zaštitnim mjerama, pa time izazove opasnost za život ljudi ili za imovinu većeg opsega.

(3) Ko krivično djelo iz st. 1. i 2. ovog člana učini na mjestu gdje je okupljen veći broj ljudi, kaznit će se kaznom zatvora od šest mjeseci do pet godina.

(4) Ko krivično djelo iz st. 1. i 2. ovog člana učini iz nehata, kaznit će se novčanom kaznom ili kaznom zatvora do jedne godine.

Član 362.

Nasilničko ponašanje

(1) Ko grubim vrijeđanjem ili zlostavljanjem drugog, nasiljem prema drugom, izazivanjem tuče ili naročito drskim ili bezobzirnim ponašanjem ugrožava građanski mir, kaznit će se kaznom zatvora od tri mjeseca do tri godine.

(2) Ko krivično djelo iz stava 1. ovog člana učini u sastavu grupe ljudi, ili ako je krivičnim djelom iz stava 1. ovog člana prouzrokovano teško poniženje više osoba, ili je neka osoba lahko tjelesno ozlijeđena, kaznit će se kaznom zatvora od šest mjeseci do pet godina.

Član 371.

Nedozvoljeno držanje oružja ili eksplozivnih materija

(1) Ko neovlašćeno izradi, prepravi, proda, nabavi ili razmijeni vatreno oružje, municiju ili eksplozivne materije, ili ko neovlašćeno drži vatreno oružje, municiju ili eksplozivne materije čija nabavka građanima uopće nije dozvoljena, kaznit će se kaznom zatvora do tri godine.

(2) Ko učini krivično djelo iz stava 1. ovog člana u odnosu na veću količinu vatrenog oružja, municije ili eksplozivnih materija, kaznit će se kaznom zatvora od jedne do deset godina.

(3) Ko dobrovoljno preda sredstva iz stava 1. ovog člana nadležnom organu, može se blaže kazniti.

Aner Žuljević, delegat



